

NOTE VI.

NOVA SPECIES BUPRESTIDARUM.

DESCRIPSIT

J. R. H. NEERVOORT van de POLL.

Trachys Frenchi, v. d. Poll.

Parva, cuneiformis, nitida, supra laete aureo-aenea, regulariter sparsimque punctis setiferis tecta (setae longae aurescentes), subtus nigro-aenea; elytra lateraliter costata. — Long. 2—2 $\frac{2}{5}$ mm., larg. 1 $\frac{1}{3}$ —1 $\frac{1}{2}$ mm.

Caput inter oculos paullo excavatum, in vertice sparsim punctatum. *Prothorax* brevis, latus, antice valde oblique angustatus; lateribus fere rectis, angulis posticis nonnihil intus directis, retrorsum prominentibus, acutis; ad basin fortiter bi-sinuatus, in medio late lobatus (lobus ante scutellum arcu emarginatus); regulariter punctatus, singula puncta setifera capitis thoracisque orbiculo inscripto circumdata. *Scutellum* sat magnum, triangulare. *Elytra* subdepressa, prothoracis base paullisper latiora, ad humeros modice rotundata, apicem versus gradatim attenuata, ad apicem late et conjunctim rotundata; lateraliter costa valida acuta instructa; punctis grossis setiferis sat dense oblecta, infra scutellum plaga magna glabra notata. *Pars inferior* punctis aliquot, orbiculis vel areulis circumdatis, instructa; *prosternum* breve, latissimum; *metasternum* in medio annulum subovale elevatum ferens.

Haec species mihi videtur *T. setosulae* H. Deyr. affinis.

Habitat Queensland bor. — Haec est prima species generis *Tracheos* Australiensis, nuperrime transmissa ab entomologo diligentissimo French, in cujus honorem ei dedicavi.